

PITA 'INA 'ETOLADI 'EBWEUNA

Pita 'ina 'etoladi gete 'enega 'ie'iteda 'aene Yesu 'ina bubuna maibo'ana bobo'ana ta esi 'imiyamwau tuta nina bale'uya 'imiyami, 'enega 'abo'ada wate tada miyamwau, ta esi 'ilobweneda be 'atedaya tada gwausowala ma 'ida emisa 'ai'aila, be muliyega Yaubada 'ida 'etoseyeda.

Lokagutoki.

1 ¹'Abo'agu Yesu Keliso 'ana tosimana, gete 'igu leta 'emiya, 'omi Yaubada 'ina tomtaiyao waesugalagala mali sena 'ediya, nadigega Ponito be Galetia be Kapadosia be Esia, be wate Bitinia 'asadiyao 'ediya. ²^a'Omi lowa Yaubada 'inuwenana be 'aene 'ida esinuwemi 'ina tomtaiyao, 'enega 'ina Yaluyaluwa Tabunega ni'atu 'igie'esasemi, nate Natuna lalanega, be 'aene Yesu Keliso nina 'enana wada ematamatane. Oboboma be nuwasiwalowa sida sinabwa 'emiya.

Emisa Yesu Keliso 'enaya

³^bYaubada tada tupu, tauna 'ida 'Inapwana Yesu Keliso tamana, manuna 'i'atenuwa 'ole'oleyeda sinabwana, ga tubuwa auwauna 'i'ebwa'eda Yesu Keliso 'ina toololimana mwawasega 'enega. Gete manuna tuta yauna tanuwayaina 'aene 'ina obobomao galewaya ma'etamo talobadi. ⁴Gote 'ena oboboma nidi 'isa'u 'ai'ailidi manumi, be geya'abo sidaudaula, nai sito'uto'umali, nai sisawasawala.

⁵^cBe 'omi oboboma nidi wada lobadi, 'eguma Yaubada waemise 'aene 'ina waiwaiyega 'ida 'ita'i'isimi, be tuta 'ana 'ebe losalowa 'enaya 'etoseyana nina 'igibununaya manumi 'ida 'ebwa'emi.

⁶^d'Enega wada gwausowala sinabwana, 'anabwa'ayoi tuta kukupana namo gete 'ena 'aina 'ebe tooyao mwaudi walobalobadi. ⁷Gete 'ediyega 'imi emisa Yesu manuna Yaubada 'itoodi. Nadigega tuga goulai kaiwe

^a 1:2 2 Te 2:13; Ep 1:4; Ib 12:24 ^b 1:3-4 1 Pi 1:23; Kol 1:12 ^c 1:5 Kol 3:3-4; Gu 20:32; Yo 6:28 ^d 1:6-7 Ib 12:11; 1 Pi 5:10; Yob 23:10; Ye 1:3

sabeluluyega sitootoodi. Ta esi 'imi emisa goulda 'isinabwa sinena, manuna goulda yage gumwagumwalina. Ta 'abo 'imi emisa waiwaina, ma'etamo Yesu Keliso 'ina apwesama 'enaya, tupu be esaesa be 'amayaba wada lobadi.

⁸ Keliso nina tauna nigeya wa'ita'ita ta tuga waobobomena, ta gete tuga wate nigeya wada 'itena, ta tuwa tuga 'ena waemisa, ta 'imi gwausowala 'enaya geya'abo tagwaegwae. ⁹ Manuna 'imi emisa 'ana masi ni'atu 'ena waapweapwesa, nate yaluyaluwami 'adi 'etoseyana. ¹⁰ Gete 'etoseyana nina lowa palopitao sienaidena ta si'ebesena, ga 'etoseyana nina 'edayasiona upaupaena be 'aene Yaubada 'ida 'ebwa'eda. ¹¹ Ta Keliso yaluyaluwana 'atediya 'igimi e'itedi 'ina 'elouyao be 'ina esaesa muliyega manudi, ga palopitao nidi mwalatoi si'ebesa to tuta 'ena be mwa'adega 'etoseyana nina 'ida apwesa'esa.

¹² Ta Yaubada palopitao nidi 'ie'itedi 'aene onaupaupa nidi sigimi simanedi nigeya taudi manudi, ta 'omi esi manumi, ta yage nina lowa manuna siona ni'atu gete wanononodi, tetela bobo'ana 'ana tosimanao 'ediyega, nate Yaluyaluwa Tabuna galewega 'ina waiwaiyega. Ta yage nidi bobo'adi manudi sieonemi, aniloseyao galewaya nuwanuwadi be taudi wate sida mwalatoni.

Bubuna 'esasena.

¹³ Enega yage gete manuna 'imi nuwanuwa maibo'ana wagiapa'alidi, be 'imi emisa wada sa'u 'ai'ailidi, 'aene tuta nina Yesu Keliso 'ida apwesama 'ebe gwausowala wada loba Yaubada 'enega.

¹⁴ Ta Yaubada 'ena wada ematamatana ta geya'abo 'imi yalakwaiyao siloiloinemi, nadigega lowa 'imi tuta emwagemwage 'enaya. ¹⁵ Ta esi 'imi guinuwa maibo'adi 'ediya wada bubuna palupaluna, nadigega tauna 'ibwauiyemi 'ina bubuna 'esasena. ¹⁶ Manuna Buki Tabu 'ena 'igwae, "Wada gie'esasemi, nadigega 'abo'agu 'esasegu."

¹⁷ Etamo Yaubada 'ina lolina 'ebweuna ta palupaluna 'enega tomota maibo'ada 'ida loineda, nadigega 'ida guinuwa, bobo'ana, nai to'umalina. Tauna Yaubada nina waeesena Tamami 'imi sidasidao 'ediya, 'enega 'ilobwenemi be wada 'amayabe tuta maibo'ana bale'u gete 'ena wamiyami.

¹⁸ Lowa 'imi bubuna tubumiyao 'ediyega nigeya bobo'ana, 'enega Yaubada emaisa 'iguinuwenasabi 'etoseyemi. Ta 'ami e'isa nina ni'atu wamwalamwalatoni 'aene nigeya yage gumwagumwalidi, nadigega siliba nai goulda, ¹⁹ ta esi e'isa nina Yaubada 'ina lami lalana bobo'ana wawasae 'enega 'i'etoseyemi, tauna Keliso nina, bobo'ai'ailina ta 'esasena.

^e 1:8 Yo 20:29 ^f 1:10 Ais 53:1-12 ^g 1:11 Lu 24:26-27 ^h 1:12 Md 13:16-17; Ep 3:10

ⁱ 1:13 Lo 12:2 ^j 1:14 Lo 6:19; Ep 4:17-18 ^k 1:15 2 Ko 6:16-18, 7:1 ^l 1:16 1 Loi 19:2

^m 1:17 2 Loi 10:17 ⁿ 1:18-19 1 Ko 6:20; Yo 1:29

²⁰Yaubada Keliso nina 'igimi esinuwena 'ina guinuwa gete manuna, ta muliyega bale'u 'imweluluina, ta ni'atu tuta 'ana 'ebe losalowa 'enaya Keliso nina 'iapwesama, 'abo'ada manuda. ²¹Ga tauna Keliso nina 'enega Yaubada waemisena 'aene tauna mwawasega 'igietoolo limena ga 'ebemi esaesa 'ena 'isa'una, 'enega 'imi emisa be 'imi nuwayaina wasa'u 'ai'ailidi Yaubada 'enaya. ²²^o'Enega ni'atu 'eda palupaluna wamuliya 'ai'ailina, gote 'enega 'imi 'esasa walobena, ta wate taudi gosemiyao waobobomedi 'atemi maibo'ana 'enega, 'enega 'ilobwenemi be wada eobooboboma 'ebweuna 'ebweuna, oboboma 'ai'aila 'enega.

²³^p'Enega 'omi ni'atu watubuwa limana, nigea tamamiyao mwawamwawasidi 'ediyega, ta esi Tamami mayawasina ta miyamiya atayana 'ina ona 'enega. ²⁴^q'Nadigega tuga Buki Tabu 'ina simana 'igwae, "Tomota maibo'adi 'atuwa pwatula, ta 'idi esaesao 'atuwa pwatula nidi senidiyao.

Manuna pwatula nidi 'iabe simwamwawasa, 'enega senidiyao wate si'oapelu.

²⁵Ta esi 'Inapwana 'ina ona miyamiya atayana."

Ona nina gete tuga 'edaya 'imiyami, nate tetela bobo'ana tauna ni'atu wanonona.

'Ola nina mayawasina.

2 ¹"Enega 'imi to'umalino be 'imi kabokaboyao onega be guinuwea, be 'imi e'ipi'ipiyao, be 'imi 'awato'umaliyao wada gutoyasedi, ²ta 'ilobwenemi be yaluyaluwami 'ana susu bobo'ana wada 'ebese. Nadigega taudi gogama meyameyadi susu nuwanuwadi, be susu nina yaluyaluwami 'adi 'etoseyana manuna.

³Ona'ai'aila, 'ida 'Inapwana 'ina 'atenuwa'ole'ole ni'atu walotoona, ⁴'enega wada mai 'Inapwana nina 'enaya, tauna 'ola mayawasina me bale'u sie'idi'idiyena, ta esi Yaubada nuwanuwana ga 'iesinuwena.

⁵'Enega 'omi wate 'atuwa mwadale mayawasina, yaluyaluwami wada tagwaledi, be 'emiyega Yaubada 'ina Anuwa 'ida 'abi, be gote 'ena wada etotaliya 'esase, ta Yesu Keliso 'ida lememe be yaluyaluwamiyega wada taliya bobo'ana Yaubada 'enaya. ⁶'Nadigega wate Buki Tabu 'ena 'igwae,

"Wa'ita 'ola gete bobo'ana ta esiesinuwana yasa'usa'u nugane anuwa 'ana 'abi, 'asa Sayoni 'enaya, manuna. 'Enega 'abo yaisigedi taudi siemisena, geya'abo siamayamaya."

⁷"Ta 'omi yaisigedi 'ola gete waemisena, 'emiya 'ola bobo'ana wawasae, ta yaisigedi taudi nigea 'ena siemiemisa manudi Buki Tabu 'ena 'isimana, 'igwae,

^o 1:22 Yo 13:34 ^p 1:23 Yo 1:13; 1 Pi 1:3 ^q 1:24-25 Ais 40:6-8 ^r 2:1 Ep 4:22; Ye 1:21

^s 2:4-5 1 Ko 3:11; Lo 12:1 ^t 2:6 Ais 28:16 ^u 2:7 Sam 118:22

“¹Ola nina lowa to'abi anuwa siguitoyasena, ta gete tugai ni'atu sietoolona be 'ie'ola nugana, be 'ola maibo'adi 'iloinedi.”

⁸“Ta wate 'igwae,

“¹Ola gete tomota 'idi 'ebe esetupe, ma'etamo 'enaya siesetupedi ta sibebe'u.”

Ta siesetupedi 'enaya manuna ona nigea siemiemise. Gete nadigega Yaubada 'ina gimiloina manudi.

⁹“Ta 'omi nigea nadigega taudi, ta 'omi esi Yaubada 'ina boda esiesinuwami, 'enega 'omi kini nina 'ina totaliyao ta 'ina tomotaiyao 'esasemi, manuna sena guguyoi 'enega 'ibwauyemi, ga 'ina maedana tobobo'ana sana 'ena 'isa'umi, be 'aene 'ina guinuwa bobo'ana gete wada simane.

¹⁰“Ona'ai'aila, tuta lowa 'ediya 'omi nigea waeboda 'ebweu, ta gete tuga ni'atu Yaubada 'ena waeboda 'ebweuna; ta lowa wate Yaubada 'ina 'atenuwa'ole'ole nigea 'emiya 'imiyami, ta gete tuga ni'atu walobena.

Yaubada 'ina toguinuwao.

¹¹“Ta gosegwao 'emiya yada simana apwesa 'aene 'abo'ada bale'u gete 'enaya toesugalagala, 'enega 'imi yalakwaiyao nidi 'atemiya simiyami waguityasedi, manuna yaluyaluwami sietalauwaledi. ¹²“Ta wada bubuna bobo'ana taudi nigea me Yudia 'ediya. Manuna gete tuga 'etamo si'awa'awa to'umaliyemi, ta tuta muliyega 'imi guinuwa bobo'ana sida 'ita, be 'enega tuta nina Yaubada 'iapwesama Yaubada nina sida tupu.

¹³“Ta ni'atu 'omi 'Inapwana nina 'ina boda, 'enega 'ilobwenemi be lina yauna bale'uya wada 'amayabedi, nadigega kini 'ina lina 'ena wada tagwalemi, manuna tauna tololina sinabwana, ¹⁴ta wate gabemaniyao wada 'amayabedi, manuna kini nina tauna 'iesinuwedi be gabemani nidi toto'umalidi sida loinedi, ta tobobo'adi sida 'awabobo'enedi. ¹⁵“Ta Yaubada 'ina nuwanuwa gete be 'aene toemwagemwageyao, 'abo sida ona besobeso manumi, 'imi guinuwa bobo'ana 'etamo sida 'ita, be geya'abo wate to'ase manumi sioneone.

¹⁶“Ta 'omi esi ni'atu Yaubada 'ili'amimi be 'aene taumimo wada loinemi, ta esi geya'abo guinuwa to'umalidi 'ediya watautauya, ta wada guinuwa tuga nadigega Yaubada 'ina toguinuwao. ¹⁷“Enega tomota maibo'adi wada 'amayabedi, ta gosemyao taudi Yesu 'ana toemisao wada obobomedi. Yaubada 'ena wada 'amayaba sinabwana, be wate kini wada 'amayabe.

^v 2:8 Ais 8:14 ^w 2:9 Sia 19:5-6; Ais 9:2; Ep 5:8 ^x 2:10 Osi 1:10; Lo 9:25; 1 Pi 1:3

^y 2:11 Ga 5:16-17, 24 ^z 2:12 Md 5:16 ^a 2:13-17 Lo 13:1-7 ^b 2:15 1 Pi 3:15-17

^c 2:16-17 Ga 5:13

Keliso manuda 'i'elouya

18 ^dEnega 'omi toguinuwa, 'imi 'ena'iyao wada 'amayabedi be 'ediya wada ematamatana, ta nigea 'aene 'ena'iyao bobo'adi namo 'ediya, taudi 'idi lina pa'alidi 'ediya wate. 19 Manuna 'abo nigea 'ebweu 'imi guinuwa to'umalina, ta sigie'elouya daisimi be Yaubada manuna wunuwanuwa sinabwana ga wae'alama'i'itanemi, nate bubuna bobo'ana Yaubada matanaya. 20 ^eTa wada nuwa'i'isi 'aene 'abo 'ida guinuwa to'umalina 'enega sigie'elouyaeda be tae'alama'i'itana, nate nigea yage sinabwana. Ta esi 'abo 'ida guinuwa bobo'ana 'enega sigie'elouyaeda be tae'alama'i'itana, Yaubada manuda 'ida gwausowala.

21 ^fTa ni'atu 'eda gete manuna Yaubada 'ibwa'yeda, manuna Keliso tauna manuda 'i'elouya, ga 'ebe e'ita 'isa'una 'edaye be 'aene 'ae iyaena tada muliyedi. 22 ^gManuna tauna nigea 'ina to'umalinamo ta wate nigea kabo 'awanega 'ida apwesa. 23 ^hTa tuta nina si'awa to'umaliyena nigea wate 'ediya 'ie'ie'isa, ta wate sigie'elouyaena ta nigea 'igamwagamwasowaledi, ta esi Yaubada 'iemisa 'ai'ailena, manuna tauna Toloina palupaluna.

24 ⁱOna'ai'aila, Keliso tauna oonega 'ida to'umalinalo 'i'aalidi kelose 'enaya, be gote 'enega 'aene 'ida bubuna to'umalidi sigugumwala, ta bubuna palupaluna 'enega tatatauya. Tauna 'ana badi 'enega 'imi bobo'ana walobena. 25 ^jOna'ai'aila, 'omi 'atuwa sipi loseloseyemi, ga ni'atu to'ita'i'ita sipi 'i'au'ewa limemi 'enaya, tauna yaluyaluwami 'ana to'ita'i'ita.

Aiai nidi 'adi lina.

3 1-2 ^kNadigega 'omi wate toai mewainemi mwanemiyao wada 'amayabedi, 'enega 'abo taudi nigea Yaubada 'ina ona siemimise, 'omi 'imi guinuwa bobo'ana 'amayabega wada e'itadi, be 'enega sida emisa. 3 ^lTa geya'abo waeiyalimi yage apweapwesadi 'ediyega, nadigega 'uya'uyami waguinuwa 'ai'ailidi, nai yage goulala 'ediyega waeiyalimi, nai 'ami 'oamao bobo'adi wa'otedi, 4 ta esi 'atemi wada eiyalidi iyalo miyamiya atayadi 'ediyega, taudi nadigega bubuna nuwana be nuwamwa'uta 'ediyega. Wada nuwa'i'isi 'aene yage gete yage sinabwana Yaubada matanaya.

5 Nadigega lowa taudi iine totapwalolo Yaubada siemisena ga 'atedi sieiyalina bubuna nuwana be nuwamwa'uta 'ediyega, ga mwanediyao si'amayabedi. 6 Nadigega wate Sela mwanena Ebelaamo 'enana

^d 2:18-19 Ep 6:5-7 ^e 2:20 1 Pi 4:14 ^f 2:21 Md 16:24 ^g 2:22 Ais 53:9 ^h 2:23 Ais 53:7; Lo 12:19 ⁱ 2:24 2 Ko 5:21; Ais 53:5-6 ^j 2:25 Yo 10:11 ^k 3:1-2 Ep 5:22-24; 1 Ko 7:12-16; Ta 2:4-5 ^l 3:3-4 1 Ti 2:9-10

'iematamatanena ga 'i'awa 'inapwanena. Ta 'abo 'omi wabubuna bobo'ana, be geya'abo 'ebweu yage wamatamataute, 'omi Sela natunao.

^{7m}Ta 'omi wate toai me'olotomi, mamwanemiyao wamiyami, wada nuwayai 'aene taudi nenetadi, 'enega wada 'amayabedi be wa'ita'i'isidi, manuna 'omi be mwanemiyao ma'emiyao yawasimi Yaubada 'i'ebwa'emi. Gete nadigega wabubuna'esa be 'enega geya'abo to'umalina 'imi sidasidao 'i'eto'etobodedi.

Guinuwa bobo'ana 'elouya 'ena 'imiyami.

^{8r}Gete 'igu ona 'ana 'ebe losalowa 'emiya 'aene 'imi nuwenuega be 'ami lotoonega wada e'ebweu be wada eoboobobomemi, be ma imi nuwamwa'uta wada 'atenuwa 'ole'oleyemi.

⁹Ta 'abo 'aidi 'emiya siguinuwa to'umalina, geya'abo 'ediya wae'ie'isa, ta 'abo wate sieliyemi geya'abo waelieliyadi. Ta esi wada e'isadi ona bobo'ana 'enega, ta Yaubada 'ionaupaupa saba be 'aene 'ida obobomemi, 'abo 'omi ona obobomega 'ediya wae'isa. ^{10o}Nadigega Buki Tabu 'ena 'isimana, 'igwae,

¹¹"Abo yaita tauna nuwanuwana be 'ida gwausowala 'asiyata maibo'ana 'ediya, 'ilobwenena be ona besobeso be kabo 'ida losa'u,

¹²ta wate guinuwa to'umalidi 'ida guitoyasedi, be 'ida guinuwa bobo'ana mali tomota 'ediya, be wate 'ida etapewa waiwai nuwasiwalowa manuna.

¹³Manuna 'ida 'Inapwana tuta yauyauna tobobo'adi 'ilomata'i'isidi, be wate 'idi sidasidao 'inono 'ai'ailidi, ta taudi toto'umalidi 'iguitoyasedi."

^{14p}Ona'ai'aila, nigeya sawesawenaya be 'ebweu yaita 'igiegie 'elouyaemi 'abo yage bobo'ana nuwami 'i'ewena, be tuta yauyauna 'ena waguiguinuwa.

^{15q}Ta geya'abo tomota wamatamatautedi nai wanuwanuwa mwau 'ediya, ta esi wada gwausowala, 'abo yage bobo'ana waguiguinuwe be sigie'elouyaemi, ^{16r}ta esi 'atemiyega 'ida 'Inapwana Keliso wada 'amayabe. Be 'enega 'abo yaita 'ienaidemi be 'ida gwae, "To'ase manuna 'uemiemisa?" ta 'omi ni'atu ma imi e'isa bobo'ana wada simana 'ediya, ta geya'abo ma imi oopa'ala, ta esi ma imi bubuna nuwana 'enega waeonadi.

¹⁷Ta to'ase wanuwena bobo'ana, tuta yauyauna nadigega wada guiguinuwa'esa, 'enega 'abo yaisigedi si'awa to'umaliyemi manuna 'aene 'omi Keliso 'ana tomuliyao, ma'etamo sida omayamaya, 'abo 'imi bubuna bobo'ana wae'itaedi.

^m 3:7 Ep 5:25-30; Kol 3:19 ⁿ 3:8-9 Lo 12:16-18; Md 5:44; 1 Te 5:15; Ep 4:32

^o 3:10-12 Sam 34:12-16 ^p 3:13 Md 10:28; Ona 16:7; Lo 13:3 ^q 3:14 Ib 10:5-6

^r 3:15-16 Kol 4:6; 1 Pi 2:15

^{17s} Eguma Yaubada 'inuwenana 'aene 'elouya tada loba, 'ilobwenada tada 'elouya 'ida guinuwa bobo'ana manuna, ta sa'i nigeya 'ana 'ita bobo'ana guinuwa to'umalina manuna.

¹⁸ Ona'ai'aila, Keliso ma'ebweuna 'imwawasa 'ida to'umalinao manudi, ta tauna tai bobo'ana, ta 'abo'ada toto'umalida ga manuda 'imwawasa, be gote 'enega 'ida 'au'ewada Yaubada 'ena. Ta Keliso oona namo siloemwawasina, ta yaluyaluwana nigeya.

¹⁹ "Enega yaluyaluwana 'iapwesa ga 'itauya yaluyaluwa yoniyonidi 'ediya 'iloguguya. ²⁰ "Yaluyaluwa nidi tomota yaluyaluwadi, taudi lowaenei Noa 'ina tutaya Yaubada manudi 'ie'alama'i'itana be 'aene 'ena sida emisa, ta nigeya. 'Enega maibo'adi muluwa 'enega sidalala, ta pu'epu'edimo bwasiyega 'i'etoseyedi, nadigega nima ta 'etoi, waga nina Noa 'i'abinaya 'enega.

²¹ "Bwasi nina gete 'ie'ita 'ai'aila 'edaya 'aene gete tuga bwasi nina 'ebe bapitaiso 'i'etoseyeda. Ta bapitaiso nina 'enega nigeya 'aene bwalada 'ana 'utu namo manuna, ta esi 'ida sidesidega Yaubada 'ateda 'igie'esasadi, Yesu Keliso 'ina toololimana 'enega, ²² tauna ni'atu 'itu'e galewaya ga gete tuga Yaubada 'atainaya 'imiyami, ga aniloseyao be galewa 'adi toloinao maibo'adi 'iloiloinedi.

'Ida bubuna tada sa'ugelasedi.

4 ¹ "Wada nuwa'i'isi 'aene tuta nina Yesu 'ietomotai 'elouya 'ilobena, ta 'imi nuwanuwa wasa'udi Yesu nadigega, be 'enega taumimo wada giepa'alimi, manuna 'abo yaisigedi taudi oodiyega 'elouya silobaloba, 'idi bubuna to'umalina ni'atu 'igumwala.

^{2x} "Enega 'ida tuta maibo'ana bale'uya tamiyami, tada tagwaleda Yaubada 'enaya be tauna 'ida loineda, ta 'ida yalakwaiya geya'abo 'iloiloineda.

³ "Lowa 'imi bubuna to'umalina, nadigega taudi guguyoi 'ana tomiyanao, be bubuna nidi getedi wada guitoyasedi, nadigega sogala be yalakwaiya be bwasi waiwaidi 'adi numa kabaleya, be egosigosiyana guinuwa to'umalidi manudi, be wate emisa kabokabo mali yageyao 'ediya. ⁴ Ta tomiya apwesa nidi sinuwa owana 'abo 'omi nigeya ma'emiyao yage nidi to'umalidi waguiguinuwedi, 'enega si'awa to'umaliyemi. ⁵ Ta esi 'etamo Yaubada tomota mayawasidi be mwawamwawasidi 'ida bwa'omatadi, be 'enega taudi tomiya apwesa nidi sida etala matanaya. ⁶ "Gete 'alena 'enega tetela bobo'ana 'iguguyaena tomwawasao 'ediya, be tuta mayawasidiya bwa'omatana sida loba, ta yaluyaluwadiyega yawasidi sida loba Yaubada 'enega.

^s 3:17 1 Pi 2:20 ^t 3:19 Ep 4:9-10; Pi 2:9-10 ^u 3:20 Nug 7:7 ^v 3:21-22 Lo 6:4;
Ta 3:4-5; Yo 3:5; Ep 1:20-21 ^w 4:1 2 Ko 5:15 ^x 4:2 1 Yo 2:16-17 ^y 4:3 Ep 2:2-3; Ta 3:3
^z 4:6 Lo 8:10

^{7a}Ta ni'atu be yage maibo'ana sigugumwala. 'Enega wa'ita'i'isimi be geya'abo walo'ame'ame, ta esi tuta yauyauna wada sidasida Yaubada 'ena. ⁸'Enega wada eobooboboma 'ai'aila 'ebweuna 'ebweuna 'emiya, manuna oboboma yage maibo'adi 'isinabwa sinedi. Ta wate oboboma sawesawenaya be to'umalina yaudi 'ikweudi. ⁹'Enega gosemiyao wabwauyedi 'imi anuwaya nuwa bobo'anega, ta geya'abo manudi walomulomugi.

^{10b}Ta ni'atu 'ebweuna 'ebweuna Yaubada egueguyai dumadumadi be dumadumadi 'i'ebwa'emi, 'enega egueguyai nidi 'ediyega wada guinuwa be gosemiyao wada lemedi, be 'enega 'omi Yaubada 'ina toguinuwa bobo'ami. ¹¹'Enega yaisigedi 'omi waetosimana wada etosimana tuga nadigega Yaubada 'ina ona wasimasimane, ta 'abo yaisigedi 'omi walemalema wada lema tuga 'imi waiwai maibo'anega, nadigega waiwai nina 'i'ebwa'emi, be 'enega guinuwa maibo'adi 'ediyega tomota Yesu Keliso sida mwalatoni be Yaubada sida tupu, manuna tauna Toesaesa sana, ta Toewaiwai sana, tuta maibo'ana 'ediyaga. Eimeni.

Yesu 'ina tomotaiyao si'elo'elouya.

¹²Ta tasigwao, geya'abo ma imi nuwaowana 'abo tuta nina 'ebetoo mwaudi walobadi. Geya'abo wanuwanuwa 'aene siapweapwesa daita. ¹³Ta esi wada gwausowala manuna Yesu Keliso 'elouya 'ilobena, ga 'omi nadigega tuga walobaloba'ese, be muliyega tuta nina 'ina esaesa 'iapwesama wada gwausowala 'ai'aila.

^{14c}^dTa 'abo tomota si'awa to'umaliyemi 'imi emisa Keliso 'enaya manuna, wada gwausowala tuga, manuna Yaubada yaluyaluwana 'esasena ni'atu 'emiya 'imiyami. ¹⁵Ta esi nigeya yage bobo'ana manumi, 'abo waloemwawasa, nai wa'i'ipwala, nai waloegesi, nai waguinuwa besobeso, be manudi 'elouya waloba. ^{16e}Ta yage bobo'ana esi, 'abo 'omi Keliso 'ina bodao be 'elouya waloba. Nate nigeya 'ebe omayamaya, ta esi Yaubada wada tupu, manuna 'omi ni'atu Keliso 'ina bodao.

¹⁷Ta ni'atu tuta 'imai saba be bwa'omatana 'ie'ale, be 'enega Yaubada 'ina tomotaiyao 'ida gimi bwa'omatada, be muliyega taudi 'ina tetela bobo'ana nigeya siemiemi, 'idi to'umalina 'ana e'isa mwau wawasae sida loba. ^{18f}Ta ni'atu Buki Tabu 'ena 'isimana, 'igwae,

“Yaubada 'ena mwauna be 'aene tobobo'adi 'ida 'etoseyedi, ta esi toto'umalidi, taudi Yaubada 'ana toe'idi'idiyao 'adi 'etoseyana mwau wawasae.”

¹⁹'Enega 'abo 'omi Yaubada 'ina nuwena 'enega 'elouya walobadi, yawasimi wada tagwaledi tauna 'ena, be 'enega 'ida 'ita'i'isimi, manuna

^a 4:7-9 Lo 12:9-13 ^b 4:10-11 Lo 12:6-8; 1 Ko 12:4-7 ^c 4:14 Md 5:11

^d 4:14-16 1 Pi 2:19-20 ^e 4:16 Gu 5:41 ^f 4:18 Ona 11:31

tauna 'ada Tomweluluwa bobo'ai'ailina; ta 'omi wate nadigega wada bubuna bobo'ana.

Yaubada 'ina tomotaiyao 'adi 'ita'i'ita.

5 ¹Toekalesiyao 'idi 'inapwanao 'omi, 'aene yada gienuwa'l'isimi 'imi paisewa manuna. Manuna 'abo'agu 'ebweu wate toekalesiyao 'idi 'inapwana, ga 'abo'agu mataguyega Keliso 'ina 'elouya ya'itena, be ma'etamo 'ina esaesa maemaedanina 'ena yada miyami to tuta 'abo 'ina esaesa nina 'igieapwese.

²⁸Enega wate yada emataluwemi 'aene 'imi bodao nidi wada 'ita'i'isidi, taudi nate Yaubada 'ina tomotaiyao. Ta wada 'ita'i'isidi 'imi 'atetagwalega tuga nadigega Yaubada 'ina nuwena, ta geya'abo ma imi logwautoyasa. Ta 'imi guinuwa wada guinuwedi, nigeya maisa manuna, ta esi tagwalega wada guinuwa.

³^hTa geya'abo watoo be waetoloina 'ediya, ta esi bubuna bobo'ana wada e'itae 'ediya, be sida muliyemi. ⁴Be 'enega tuta nina To'ita'i'ita sinabwana 'iapwesama, tauna 'enega 'ami pali bobo'ana ta miyamiya atayana waloba.

⁵ⁱEnega 'omi wate tubu lagalagao 'inapwanao wada 'amayabedi, be maibo'ami wada nuwamwa'uta be 'ebweuna 'ebweuna 'emiya wada elemalema. Nadigega tuga Buki Tabu 'isimana, 'igwae,

“Yaubada tonuwatu'e 'i'etobodedi, ta esi tonuwamwa'uta 'i'obobomedi.”

⁶^jEnega wada nuwamwa'uta be wada tagwalemi Yaubada Toewaiwai sana nimanaya, be 'enega muliyega tauna 'ina tuta bobo'ana 'enaya 'ida gitu'eyemi.

⁷^kTa 'ami mwauyao maibo'adi Yaubada 'ena wada 'ebwaya, be 'enega 'ami mwau nidi 'i'ewayauledi, manuna Yaubada tauna 'i'atenuwa'ole'ole 'ai'ailemi.

⁸^lEnega wada lomata'i'ita 'ai'ailemi 'ami talauwala Seitani 'enega. Manuna Seitani tauna nadigega bosasa mitawaya, tuta yauyauna 'isakosakowasi ta 'i'ebe'ebesa be 'aene 'ana tai 'ida loba, be 'ida 'ani. ⁹^mTa geya'abo wamatamatauta, ta 'imi emisa 'ena wada toolopa'ala, manuna wada mwalatoni 'aene gosedaο taudi Yesu 'ana toemisao mwau nidi silobalobadi sena maibo'adi 'ediya.

¹⁰ⁿYaubada tauna 'atenuwa'ole'ole 'alena ni'atu 'ibwauyeda be 'aene 'ina esaesa miyamiya atayana 'ena tada miyami Keliso ma'eda.

Ta 'imi 'elouya tuta kukupana namo be sigugumwala, ta muliyega Yaubada 'ida gie'esasemi be 'ida giepa'alimi be 'ida giewaiwaiyemi

⁸ 5:2 Gu 20:28 ^h 5:3 Pilim 1:14; 1 Ti 4:12, 5:1; Yo 13:14-15 ⁱ 5:5 Ona 3:34; Lu 22:26

^j 5:6 Pi 2:8-9 ^k 5:7 Md 6:25-26 ^l 5:8-10 2 Ti 4:17-18; Lo 8:18 ^m 5:9 Ep 6:11-13; Ye 4:7

ⁿ 5:10 1 Te 5:23-24

be 'aene wada miya bobo'ana. ¹¹Manuna tauna Toewaiwai miyamiya atayana. Eimeni.

Ona oboboma

¹²°Imi leta gidalina gete Sailasa 'ilemegu ga ya'etoladina manumi. Tauna Sailasa nina taeesena 'aene 'ebweu tasidai ma ina emisa.

'Enega 'imi leta gete 'ena nuwanuwagu be Yaubada 'ina oboboma 'ai'aila yada simane 'emiya, be 'enaya wada toolopa'ala.

¹³°Ta wate toekalesiyao sena gete Babiloni 'enaya 'idi oboboma 'emiya. Taudi Yaubada 'iesinuwedi nadigega tuga 'omi 'iesinuwemi, 'idi ona oboboma 'emiya. Ta wate natugu Maki 'ina ona oboboma 'emiya.

¹⁴'Enega wada eobooboboma 'ebweuna 'ebweuna 'enaya, be wada enimalotuna oboboma 'ai'ailega. Ta 'omi Keliso 'ina tomotaiyao wada miya gwausowala.

'Abo'agu Pita.